



程雲棧紀

江苏工业学院图书馆
藏书章

孫林棠題

光緒辛卯
雖園校刊

雲棧紀程卷一

廣漢 張邦伸 雲谷編輯

雲棧爲秦蜀咽喉山川嶮阻昔人比之上青天入石穴然勝蹟異聞所在多有水經注名勝志諸書均有紀述第其卷帙浩繁不便行笥 國初漁洋

山人著蜀道驛程記及隴蜀餘聞等集士大夫往來是路者多取資焉余自秦返蜀爰就所聞彙而輯之以便異日之臥遊且使履其地者知爲某山某水遇目騁懷可以忘登頓之苦至詩文有關地

志者亦間附採列爲小註其不知者從闕示愼也

自西安至武功

辛丑十月朔余束裝西歸自西安登程西安本禹貢
雍州之域周武王克殷定都於鎬則雍爲王畿平王
東遷雒邑以岐豐之地賜秦襄公至孝公作爲咸陽
築冀闕徙都之故謂之秦川亦曰關中始皇置四十
郡以此爲內史秦滅項籍分秦地爲三國曰雍曰翟
曰塞謂之三秦漢初屬塞國後改爲渭南尋罷復爲
內史武帝立京兆馮翊扶風爲三輔自周秦漢晉西

魏後周隋唐並爲帝郡梁曰永平晉曰晉昌宋曰永興元曰安西曰奉元明爲西安府 國朝因之附郭縣二曰長安曰咸甯舊城漢惠帝元年築六年成酈道元水經注秦離宮無城故城之蜀道驛程記長安舊城有二漢都城在今府西北二十里名北斗城直子午谷隋於漢故城東南據龍首川爲新都號大興城直石鼈谷唐因之宋呂汲公大防嘗刻長安圖今西安府治長安咸甯二縣何仲默以爲在隋唐宮城之間城十二門水經注東出北頭第一門曰宣平門

雲木系禾
一
一曰東都門卽逢明挂冠處也第二門曰清明門一
曰凱門又曰藉田門第三門曰霸城門又曰青門門
外出好瓜昔廣陵人邵平爲秦東陵侯秦破爲布衣
種瓜此門世謂之東陵瓜阮籍詠懷詩云昔聞東陵
瓜今在青門外連畛拒阡陌子母相鉤帶卽此也南
出東頭第一門曰覆盎門亦曰下杜門又曰端門北
對長樂宮第二曰安門亦曰鼎路門北對武庫第三
曰平門又曰便門一曰西安門北對未央宮西出南
頭第一門曰章門王莽更名萬秋門亦曰光華門第

二門曰直門故龍樓門也第三曰雍門王莽更名章義門其水北入有函里民曰函里門北出西頭第一曰橫門其外郭有都門有棘門棘門秦時宮門也徐厲軍於此備匈奴第二門曰廚門又曰高門第三曰利門其外有客舍故民曰客舍門凡此諸門皆通達九達三途洞開隱以林木左出右入爲往來之徑行者升降有上下之別漢武帝爲太子元帝嘗急召之太子出龍樓門不敢絕馳道西至直門方得度上怪遲問其故以狀對上悅乃著令令太子得絕馳道也

廟記云長安市有九各方二百六十六步六市在道
西三市在道東張衡西京賦云郭開九市通闐帶闐
旗亭重立俯察百隧是也三輔舊事長安城中八街
九陌閭里一百六十有香室街夕陰街尙冠前街天
門街華陽街章臺街藁街及宣明建陽昌陰尙冠修
城黃棘北煥南平等里西京賦云參塗夸庭街衢相
經塵里端直費宇齊平是也三輔黃圖秦離宮二百
復起阿房又云漢畿千里內外宮館一百四十五所
今考漢宮在長安城內外者十曰長樂宮曰未央宮

曰建章宮曰北宮曰明光宮曰太子宮曰長門宮曰
鈎弋宮曰儲元宮曰宣曲宮在上林苑者四曰昭臺
宮曰大臺宮曰扶荔宮曰蒲萄宮其餘自甘泉而外
皆在各郡縣三輔黃圖長樂宮本秦之興樂宮漢修
飾之有鴻臺有臨華溫室信宮長秋永壽永甯等殿
高帝居此漢書元康四年神爵五采以萬數集長樂
宮五鳳三年鸞鳳集長樂宮東闕中樹上在長安中
近東直杜門未央宮高帝七年蕭何造因龍首山以
制前殿上見其壯麗之甚怒曰天下匈匈勞苦數歲

成敗未可知是何治宮室過度也何對曰天子以四海爲家非令壯麗無以重威且無令後世有以加也上悅至孝武以木蘭爲枌橧文杏爲梁柱金鋪玉戶華襍璧璫雕楹玉碣重軒鏤檻青瑣丹墀左碱右平黃金爲壁帶間以和氏珍玉風至其聲玲瓏然也有宣室溫室清涼在其北宣明廣明在其東昆德玉堂在其西蒼龍白虎朱雀元武以正四方又有麒麟殿金華殿掖庭宮椒房殿高門殿非常殿織室凌室暴室弄田內謁者署金馬門路輪廐建章宮武帝建有

駘蕩馭娑粉詣天梁奇寶鼓簧等宮又有玉堂神明
堂疏圃鳴鑾奇華銅柱函德二十六殿漢郊祀志武
帝作建章宮度爲千門萬戶前殿高於未央其東則
鳳闕其西則商中數十里虎圈其北治大池漸臺名
曰太液池中有蓬萊方丈瀛洲壺梁象海中神仙龜
魚之屬其南有玉堂壁門大鳥之屬立神明臺井幹
樓輦道相屬焉關輔記云桂宮在未央宮北有明光
殿三秦記明光殿皆金玉珠璣爲簾箔處處懸明月
珠金陛玉階晝夜光明水經注未央宮西池中有漸

臺漢兵起王莽死於此東有樛里子墓樛里子名疾
秦惠王異母弟也滑稽多智秦人號爲智囊葬於昭
王廟西渭南陰鄉樛里故俗謂之樛里子云我百歲
後是爲天子之宮夾我墓疾以昭王七年卒葬於渭
南章臺東至漢長樂宮在其東未央宮在其西武庫
直其墓秦人諺曰力則任鄙智則樛里也鈞弋宮鈞
弋夫人所居也列仙傳曰鈞弋夫人姓趙氏河間人
少好酒病臥六年右手鈞卷飲食少望氣者云東北
有貴人推而得之名見姿色佳麗武帝及其手得玉

鈎而手展有寵生昭帝姪娠十四月上曰聞昔堯十
四月而生今鈎弋亦然乃命所生門曰堯母門所居
曰鈎弋宮自夫人加婕妤後得罪掖庭獄死及殯香
一月昭帝卽位追尊爲皇太后更葬之發六十二萬
人起雲陽陵其棺槨但有彩履王褒雲陽記曰鈎弋
夫人從至甘泉而卒尸香聞十餘里葬雲陽武帝思
之起通靈臺於甘泉宮有青鳥集臺上往來至宣帝
時乃不至其閣有石渠閣天祿閣麒麟閣白虎閣屬
車閣其苑囿有周靈囿漢上林苑甘泉苑御宿苑思

賢苑博望苑西郊苑三十六苑樂遊苑宜春下苑梨
園其池沼則周靈沼鎬池漢昆明池滄波池太液池
唐中池百子池十池欽飛外池秦酒池影蛾池琳池
鶴池冰池其臺榭則周靈臺漢靈臺柏梁臺漸臺神
明臺通天臺涼風臺魚池臺酒池臺蓍室臺鬪雞臺
走狗臺壇臺韓信射臺果臺東西山臺鈞弋臺通靈
臺望鵠臺眺瞻臺桂臺商臺避風臺長楊榭駱賓王
帝京篇
云山河千里國城闕九重門不覩皇居壯安知天子
尊皇居帝里峻函谷鶉野龍山侯甸服五緯連影集
星躔八水分流橫地軸秦地重關一百二漢家離宮
三十六桂殿陰岑對玉樓椒房窈窕接金屋三條九

陌麗城隈萬戶千門平旦開複道橫通鳩鵲觀交衢
直指鳳凰臺劒履南宮入簪纓北闕來聲名冠寰宇
文物象昭回鈞陳肅蘭祀璧沼浮槐市銅羽應風迴
金莖承露起校文天祿閣習戰昆明水朱邸抗平臺
黃扇通戚里平臺戚里帶崇墉炊金饌玉待鳴鐘小
堂綺帳三千戶大道青樓十二重寶蓋雕鞍金絡馬
蘭窗繡柱玉盤龍繡柱璇題粉壁映鏘金鳴玉王侯
盛王侯貴人多近臣朝遊百里暮南鄰陸賈分金將
燕喜陳遵投轄正留賓趙李經過密蕭朱交結親丹
鳳朱城白日暮青牛紺幃紅塵度俠客珠彈垂楊道
娼婦銀鉤採桑路娼家桃李白芳菲京華遊俠事輕
肥延年女弟雙鳳入羅敷使君千騎歸同心結縷帶
連理織成衣春朝桂尊尊百味秋夜蘭燈燈九微翠
幌珠簾不獨映清歌寶瑟自相依且論三萬六千日
甯知四十九年非古來名利若浮雲人生倚伏信難
分始見田實相移奪俄聞衛霍有功勳未厭金陵氣
先開石槨文朱門無復張公子灞亭誰畏李將軍相
顧百齡皆有待居然萬化咸應改桂枝芳氣已銷亡

柏梁高晏今何在春去春來苦自馳爭名爭利徒爾
爲久留郎署終難遇空鎖相門誰見知當時一旦擅
豪華自言千載長驕奢倏忽搏風生羽翼須臾失浪
委泥沙黃雀徒巢桂青門遂種瓜黃金銷鑠素絲變
一貴一賤交情見紅顏宿昔白頭新脫粟布衣輕故
人故人有湮淪新知無意氣灰死韓安國羅傷翟廷
尉已矣哉歸去來馬卿辭蜀多文藻楊雄仕漢乏良
媒三冬自矜誠足用十年不調幾遭迴汲黯薪逾積
孫弘閣未開誰惜長
沙傳獨負洛陽才
其名勝則韋曲杜曲灞橋樊川

宮人斜

雍裕之宮人斜云幾多紅粉委黃泥野鳥如
歌又似啼應有春魂化爲燕年年飛入未央

栖孟遲宮人斜云雲慘煙愁苑路斜路傍邱冢
盡宮娃茂林不是同歸處空寄香魂著野花

皇子

陵杜陵原鴻固原神禾原樂游原杏花坪古龍堂高

冠潭香積寺

王維過香積寺云不知香積寺數里入
雲峯古木無人逕深山何處鐘泉聲咽